

正校 翼駟稗編卷三目錄

狐逐妄人

雷誅陰惡

全女後報

鬼不得殺有祿人。

康中丞遇狐

杏花精

太歲

冤鬼報讐

鬼入耳

玉猴

水官圖

張提軍逸事

神醫

姦殺詐勾二案

雙魂化蝶

三重魚

俠償

龍王出巡

儲生返魂

吳三桂

仙官祈雨

還杏花

贈眼鏡

游絲毒

吳生奇遇

救生椿

蛇精

夜光豬

瓜蛇

生魂書額

龍馬

蟹蟲殺人

放龜救子

假妖自斃

陰德延算

僧報

包痘

陸凌霄

王馥堂

校正翼翽稗編 卷三目錄

二

聚馬臺

長春邱真人救荒三策

宋若水

舟女殺盜

狐捉刀

厲鬼畏犬

鬼贈贖金

蟒母

駝媼

錢妖

靈官書吏

正校
翼駟稗編卷三

北平 湯用中 荃卿 著
武進 徐廷華 子楞 評

狐逐妄人

丹徒毛二爲某鹺商大夥移家揚州家頗中資其堂弟某秀才虎而冠者也艷其富率妻子渡江強與同居索借萬金少不遂意錐几碎盞凌藉百端毛忍氣下之後樓向有狐仙自被占住遂無閒屋一日某額爲飛石所傷頻見怪異知爲狐祟尙無去志夜同妻寢至曉則與子婦易楊辮髮互結牽拽顛仆斷之始開偶與館師坐談空中飛下一紙上書曰某先生亦同妄人語耶若不動公憤有如此石旋一巨石墜几上訇然有聲几立碎師駭絕力勸之歸某亦恐再惡作劇携脊去毛妻大喜焚香叩謝聞空中語曰此等人應如此收拾何謝爲四顧張皇杳無蹤跡由是事之益虔

雷誅陰惡

粵東永安縣生女溺棄相習成風雖經大吏屢次嚴禁縣官捐建育嬰堂城坊稍

知感化而鄉曲惡習如故有李翁者家小阜年六十餘爲子娶婦望孫甚切適婦有妊而子遽卒翁戒其婦曰生男固住生女亦足慰切勿溺棄婦誓遵翁教及將娩適有事歸寧輿中顛簸胎動遂產母家產後昏臥神少定問所生兄應曰女也棄之矣婦雖悲哀然無如何李翁聞婦產亟至知已被溺頓足追悔含憤遂行歸經塘側聞啼聲一新產兒浮水上尙未死撈起裹置懷中擬折回交婦乳之婦兄適至兄懷中兒色變忽暴雷一聲立震仆方悟兄卽婦產兄利翁財欲絕其嗣而攘其產也遠近聞其事溺女之風稍息

全女後報

如臯王翁年四旬餘妻患痰迷兼雙瞽終歲臥牀孤無子女欲置妾而苦無資節縮二十餘金購一婢年十四矣擬俟長而納之其友張某聞之踵門致賀索觀新寵翁笑曰婢耳非妾也遂令出拜張諦觀慘形詞色翁駭問曰是吾族妹亡叔某之女也不意流落至此翁亦與其叔有舊駭曰僕實不知果爾當撫爲女研問良確遂爲父女年十七字富室某翁子親送畢姻留壻家旬餘始返入門見妻坐堂上兩目復明覩翁至喜立歡迎曰壻家何如奚歸之速翁訝其語不癡且行走自

若亟問何能至此曰君去後有鄰媼來伴宿每爲我按摩諸病若失昨夜以二雞子啖我晨起則兩眼能覩物矣方欲叩謝門戶未啟而其人已杳意者殆遇仙乎翁喜出非望偕妻焚香叩謝媼信水復至連生二子將冠同入泮

鬼不得殺有祿人

陽湖東鄉白翁居積富有而房屋卑隘離村六里許一鎮市有巨宅出售以有邪崇賤值得之召匠興工大加修葺就近託鎮上某肆主計者董其役未幾主計者赴蘇白乃挽表弟蔣明經往代時方盛暑月色如晝蔣苦蚊擾獨坐納涼忽廳後門戶自開一隻徐步出涼帽繭袍揮扇而去蔣毛髮森豎亟入房剔燈臥甫就枕梁上窸窣聲垂一弓鞋方骸愕聞又一鞋垂下須臾白裙紅衫一女子頸拖白練逕至牀前蔣幾喪魂魄抱頭偃臥女倚牀闌舌數寸出涎珠珠下滴著首如冰正在危急前叟復搖扇入蔣自忖一鬼已不能支再益一鬼命必休矣忽叟謂女曰李大姐前村某家放焰口何爲不去覓食女曰我於初更到彼城隍土地皆至正欲飽享和尙竊窺婦女誦經多錯諸神大怒去衆鬼亦渙然並散因此人無故占我住房殺之以冤替耳叟曰勿猛浪此人尙有十八年首蓓盤未享焉能就死女

曰怪來尋常人只須冷涎一滴魂已出竅此人屢滴不動非以此耶叟以扇向蔭一拂頓覺清醒叟女並香

康中丞遇狐

康蘭臯中丞少時居河南懷慶府清化鎮故宅一日自外歸聞齋中嗽聲疑而窺之一人方巾道服白面長髯方據案觀書見中丞至起立徐徐退身入壁久之始滅一日月夜又見之叱問何爲乃跪白曰此故居也偶出玩月不意致驚請從此移去後遂寂然

杏花精

盧鳳道署駐鳳陽爲明時鳳督故署署中合抱大樹數十株春初羣鶯抱子巢其顛晝夜叫聒攪人不安白門蔡友石觀察來署長隨葉某住近三堂夜忽有美人來就葉方少年意良得欣然納之來無虛夕未幾消瘦骨立歸至半途而卒雖共知死於魅究不識魅爲何物也有一門子言前任吳時一少年病如葉亦死於是後遂相承不入此室周敬修制府官此時因惡鶯擾命盡伐樹傾其巢後院有杏花一株高不及簷僅盈把方施鋸血出如瀋以白周周卽命止伐衆方知葉某等

之死皆否爲之崇也制府嫉惡最嚴乃此杏轉以魅人得免奇矣

太歲

秦芝軒尙書撫江西時嘗延某代天師至省建醮天師年甚少好飲善談與尙書長公子爲莫逆交時將逼歲天師辭歸中丞留之不可使公子問之曰每歲元旦諸神朝天畢必朝龍虎山此乃大典不容不歸中丞曰召諸神來朝何如天師曰此閒塵市喧雜恐褻神祇公子曰後園極潔可冀除後樓五間以備設壇強而後可小除日天師沐浴齋戒呼公子堅囑曰此事非同兒戲斷不可使一人來窺致有觸犯爲禍不小公子有小童喜兒金陵人性巧黠聞其事乘夜潛攝梯上樓伏座後窺之五更許天師金冠盛服向天禮畢升坐旋見霞彩晃耀異香徐來諸神以次入謁天師拱立受參最後一赤面長髯者下揖天師離座旁立恭候神光耀目不可逼視須臾怪風驟起一神至天師急舉袖障面喜兒凝視其神形體正方徧身皆眼精光射人駭極仆地天師覺之俟神去徐下樓呼從人將喜兒灌醒自言所見天師曰此太歲也我尙避之不敢見汝何人乃敢偷窺不出七日死矣後果暴卒

冤鬼報讎

處州府溫大守闍人顧某忽抱病自批頰罵曰負心人乃在此耶太守怒親至其房叱曰何物野鬼敢入公署崇人顧卽起立向太守屈一膝曰小的不敢小的有下情上稟太守曰汝係何鬼有何冤孽答曰小的徐忠京師人向與顧某相好同跟江西瑞州府吳大老爺到任時有陋規五百兩顧欲背主分潤小的力阻渠乃携銀呈主人曰徐某欲私分此項經其奪回主人銜之借事將小的攆逐小的細細打聽方知爲顧中傷只得收拾回京至浙江省抱病兩年流落不能歸時顧適在藩署司閤往尋之拒不見一日遇於途渠昂然乘輿不顧小的攀輿與語卽令從人痛毆并將小的押起小的受苦不過遂投繯死今始尋着斷不饒他訴畢作叩頭狀時刑名朱某亦大病藝語喃喃朱倚父在撫幕播弄是非視賄重輕定罪出入久爲合署切齒太守因問鬼曰現朱師爺病亦有鬼耶曰朱師爺處皆積年被刑怨魄也未幾朱碎嚼其舌死顧亦死

鬼入耳

平湖董生年二十餘頗俊逸從其舅習慕山陽偶出遊途遇一美婦睨之微笑招

以目生尾之出城至隱僻處有小屋一閒女邀生進一牀外無長物入以游詞笑不拒遂與爲歡有賣菜傭過其地見生伏一棺作雲雨狀知爲鬼迷救醒送歸縣署大病月餘乃安一日薄暮方據案作書忽耳中奇癢似有物鑽入者探之則無從此左耳作種種鳴聲不復能聽以爲氣閉治之半月不瘥一夕枕上忽聞悄語曰前次野合爲人驚散尋君月餘今幸入耳有安身處可終身相守矣細辨其音則前遇婦人也驚問曰旣欲相救何不出共談笑匿耳何爲女曰緣未至問何時曰四十八月不解其語由是每夜縱談他人殊無所聞越二年女謂謂生曰君可娶矣生曰家貧聘尙未能娶於何望女曰固知之山陽某紳家巨富止一女年十七貌極美昨夜暴病卒有往言如肯以女妻我能生之渠必允君但以耳就女口鼻間妾卽借軀復生與君圖永好也生如言果得妻耳聾亦愈

玉猴

金陵蔡生有一玉猴長五寸許白類羊脂而雕琢生動祖遺物也偶遊湘中戀一妓瀟雲欲娶之而無力乃以玉猴獻某中丞中丞故與有舊得猴喜甚贈三百金遂贖妓歸旣抵家薄田數畝適連歲荒歉貧不可支遂仍出遊舟泊大姑山夜夢

一白衣道人向之舉手曰別主人三年今將復歸明日可俟我於大姑神祠醒而異之至曉赴祠瞻謁適某中丞子亦至少一遊囑卽芟芻出遺一物於階下拾視則玉猴也狂喜懷歸以其通靈繫腰閒坐臥與俱適白蓮教竊發生連夜逃歸中途遇寇露刀相向忽一白猴從跨下躍出撲殺諸匪乃得脫心知玉猴之神抵家供祖先神盒中朝夕禮拜一夕夢白衣道人促生曰起起余大難至矣起視盒中猴已被竊懊喪無似年餘生登賢書人都禮試寓某相國宅旁聞宅中有白猴夜出壓人相國驚恐成疾生心疑玉猴而無從探其確耗乃僞爲卜者至相國門云能治驚憂異症相國命生占之生卜曰此器物妖也因詢所常出入處秉燭俟之至三更物果出向生欲撲生呼曰玉猴玉猴主人在此遂復原質捕之歸以妖除對相國旋愈生成進士因相國力入詞館後簡放雷瓊觀察渡海波浪大作兩龍挾舟欲傾忽玉猴從袖底飛出兩龍隨之瞥然逝久之不返生旋罷官歸卒於家

水官圖

唐張僧繇所畫水官圖真跡向藏方敏恪公家相傳宅中永無火患第不可攜之舟行恐驚動江湖水族也敏恪孫彥和太守忘之置簾中渡洞庭湖忽波翻浪湧

蛟龍都浮水面舟岌岌欲覆大驚因憶祖戒急取圖投水中風浪頓息天地間信有神物也余於僚胥左巢生光祿處見明人臨本亦極生動惜張卷已失不復能覩廬山真面目矣

張提軍逸事

雲南張提軍其父驅騾馬爲業嘗載茶客行至貴州寓店病甚其地在萬山中諸客急於行程委之去未幾遂死藁葬店後亂峯間張時方六七歲類向母問父所在母曰隨茶客出三年餘矣張卽欲往覓母曰兒穉且諸客遷徙無常何處可尋乃止比長勇力絕人尤善火鎗發無不中遂入伍籍性至孝奉母甘旨已則粗糲自茹常入山打生奉母餘鬻錢以佐薪水數年鳥獸竄匿遂裏糧深入一日盛暑逼暮暴雨大至張避樹下雷電繞樹欲擊輒不下張念平日多傷物命或于天怒出跪雨中雷旋繞如故仰視見樹巔一物長五尺許雷下擊輒張口吐黑烟雷卽避去張取鳥鎗擊之物出不意顛墜雷卽下擊死須臾雨止張亦困甚緣樹臥枝柯間至天明尋至舊處一土狗死樹下旁銀一封有硃書符篆乃懷銀解帶縛物負歸平銀恰二百兩朱書人莫能辨立帝宮老道士識之曰此天書也其文云助

雷擊妖賞銀二百他日功成仍獲顯報張由是資用甚裕適調征大金川張以銀付母隻身獨行比至大軍方攻某礪累旬不下死傷山積張奮然曰死守一礪不思出奇制勝徒傷士卒何爲也適經畧有腹心在其營歸白其語經畧寄之召入問狀張曰今守礪賊漸懈若乘夜繞出礪後攻其不備可望得志經畧遂與五百人統之往攻張不肯行曰將不習兵兵不習將兵將不習約束不明身不足惜如國事何經畧悟立與五品銜撫其背而遣之乃爲鐵指甲取過山鳥一具縛背上捫蘿附葛乘夜繞出礪前諸軍隨之會大雷雨賊果不備張至燃過山鳥仰擊礪賊盡殪遂獲首功金川平擢副總戎以不得父耗三十年餘未娶欲辭官往尋族人勸止奉 旨授清江協鎮由雲南赴任經其父死處入店小憩店主一白髯翁也屢目張張心動問故曰翁二十年前有雲南張姓者爲人牧馬死此酷肖將軍將軍安姓曰姓張遂偕至葬所張親發其封遺骨儼在刺血滴之立沁入乃大哭封築而去有善風鑑者曰此虎穴也當出三代封疆遂卽其地建瑩焉

神醫

吾鄉蔣紫眞先生精於醫生平不輕爲人治疾所著醫書皆精闡靈蘭之祕惜身

後多散失余曾得其醫案一冊議論突過前代武進有周姓者其母晨入後園割筍失足傾跌竹斷鋒入腹中掖之腸隨出已斷矣周往求先生先生曰嘻腸斷其可續乎仰視不顧周窘往求鄰翁翁曰此君好奕而嗜餅少頃吾邀之來奕子可持餅進俟其食畢長跪哀之當肯往周如言治餅而往蔣心方戀奕餅至頓盡數枚舉首見周跪伏駭問何爲鄰翁爲致誠意蔣曰姑試往診以盡吾技遂同行入視出謂周曰創雖可治但十年後必有奇變恐子不忍視也周時迫於求生堅懇速治蔣入藥一刀圭敷其腸用線縫之納腹中加以縫紉施雞皮焉復研藥一丸入口中夜半而甦一月如平人又八年乃死或問十年後如何曰腸斷不能不續十年後續處必生肉葷飲食渣滓不下達必從上出耳楊穆如明府爲余言

姦殺詐幻二案

山陰陶某幼依其戚習幕淮安戚死流寓不能歸充某邑刑胥買幼婢執炊相依如父女數年少有所蓄遂於本邑娶妻無何婢已及笄妻欲鬻之陶不忍略備奩具嫁一民壯爲室然貧甚恒周恤之越年餘邑中來一星士推測多奇驗陶令推算星士決其立冬日必死陶爲之憂疑不釋妻勸慰之迨秋杪陶雖無疾而悵悵

日甚妻曰或恐有先妄炎盡乞假閉門邀一二知交相聚排遣何如陶從之招友暢飲流連晨夕至立冬日竟無恙更餘客皆半酣陶入內少憩忽聞室中轟如雷衆趨視見陶面血披髮拔戶出行甚駛衆挽之遽投河沒數日屍亦無蹤莫不謂星士如神陶負宿孽矣妻無所依醮某甲去獨所嫌婢痛如喪父每聞鬼哭聲陶每見形謂婢曰我死甚慘汝當爲我復仇其夫復途遇陶浴血相向責其不爲申雪時陶屋尙扁閉而宰斯土者爲少年科目有治才遂以夫婦所見密陳官令導往發扁周視見壁角有血痕房後地土亦微有跡掘之陶尸儼然拘其妻訊乃知所醮某甲素善洵自幼有私預賂星士惑以生死至日先伏某甲室中陶入殺之掩埋而甲詐爲陶中惡狀奪門投河先期設宴欲令客左證其事使人不疑也得實並置諸法

乾隆時山東邱縣鄉民家尙溫飽有一子娶婦貌頗佳逾半年婦寧既匝月子控衛往接距婦家條二十餘里半途經古墓下樹木虧蔽相傳有妖婦入叢莽搜焉子控驢以待少頃婦出所著褌本綠色忽易藍心疑一時目眩未之詰察其神情蒼憫亦異平時抵家乘間語父父曰安得有此並置不問翁媪故與子對房居晚

飯畢以子婦遠道初歸促命早息夜半翁媼望子舍尙有燈光竊意何事復起旋聞拍拍聲似鳥鼓翼繼而噉然一聲如怪鷗怒號破窗飛去急起視窗開子破腹死於牀婦失所在箱篋牀帳並完好惟少一護褥布單官驗邏察絕無端緒於是聞傳某村婦爲妖攝去矣閱數年有少年科目新蒞任細閱案卷喟曰此姦殺也妖攝婦不必死其夫即殺矣豈能持刀割腹且攝布單胡爲遂拘兩造重加嚴鞫問有村民無故外出久不歸者否婦父言有某村某戚出已數年問在案前乎在案後乎云約略同時令曰盜在此矣乃拘戚之父母細問平日出游何處最熟遣役隨往縱跡至清江浦見一婦當壚酷似女須臾夫至果某戚也拘解歸訊則婦素與戚姦道出塚閒借作疑陣爲刼殺遠竄之計是夕先啟戶出婦而已作破窗飛逝狀以示怪異布單血污不類妖噬故捲之而去也大凡姦謀百出然未有如此二案之詭祕者卒之人命無不白之冤官法有難逃之鑒任爾百端詐幻豈能倖逃天網哉

雙魂化蝶

海州羅應舉女許字周萬成未婚而萬成溺水死女謂於父母欲奔喪不許再三

哀懇終不許乃自經死父母傷之延僧作瑜珈道場中夜有白蝶一雙大如盤栩栩然飛繞靈次人共見之

三重魚

山陽諸生王予岐遊南昌經廣潤門外見漁人網一魚剖之無腸止有一魚再剖又一小魚又剖纔有腸錄之以資異聞

俠償

順治年宜興木商湯翁家可中資而性豪邁以任俠聞嘗挾資遊湖湘閒橐藏巨金另貯六十金於囊供途中費有三人乞附舟一杭州二無錫皆經商而返者同行十餘程湯囊金失去錫客悲曰吾輩附舟而子失金盍各出囊篋閱之衆從其言至杭篋六十金在焉湯一見搖首曰此非吾金安得誣他人未幾梁溪二客別去杭客獨留湯問曰覩子狀貌意氣非久下人者顧終日書空咄咄何耶客泣告曰寒家頗不落窳現行浙離擁資數百萬第某失繼母歡時時督過之父憐我付數百金出外行賈不意折閱殆盡欲歸無顏見父且恐重得罪繼母此時偷得百金粉飾或可圖父子完聚耳湯曰此非難事何戚戚爲質明贈以三百金而去踰

年湯以事過杭見有僕從十餘擁一素輿而前湯注視輿中人出拜伏於地卽昔日贈金人也時父母已歿邀湯至家款洽累月酬以三萬金焉

龍王出巡

登萊濱海每年春秋時龍王出巡先期夜叉持牌行水面各漁相戒莫敢舉網至期大蝦長數十丈逐隊而來繼之蟹黿約千數又有夜叉持旗旛數百事排列徐行隨後白霧一團隱隱聞鼓樂聲則龍王至矣於是具香案禮拜龍王過後網罟競下得魚倍常

儲生返魂

宜興諸生儲震雷病死遇其父謂曰汝兒聞王可以情求判官爲汝世兄王某余已囑之矣言訖冥差道行俄至一殿伏階痛哭王曰人誰不死汝讀書明理何作此兒女態爲儲曰死固當然但生員有不可死者二父死未葬遺累孤孀一也子幼讀書未成書香一脈忽焉中斷二也言已哭甚哀王命判官查生死簿判言儲生陽算已盡食祿未完又命查功過簿判曰上年兩邑大荒儲生田百畝捐米二石可作一小功又撫其內姪某成立爲之完配已生一子查未畢王遽推案起曰

存亡繼絕可延壽一紀乃放回後十餘年卒

吳三桂

康熙癸酉海鹽徐容赴省試祈夢于忠肅公廟忠肅謂曰歸語汝祖吳三桂一案發矣榜發獲雋始以夢告祖時年八十餘茫然不解凝思久之曰是矣余少時有婢三桂與吳姓僕通事露汝祖母欲致之死余力勸以婢歸僕遣之不意事隔六七十年神猶錄其小善而以科名報也

仙官祈雨

康熙某年蘇州大旱中丞率屬虔禱一日有黃冠至曰旱係天數中丞必欲違天非得上界仙官不可乃出一小鏡曰持此照十三四歲童子有一人二影者幣聘之以六爲率如之得吳城三人無錫三人道士乃披髮登壇書符誦咒另取二鏡徧塗墨選健者十六人乘快船載童操飛槳直赴湖心以符鏡擲之一炊許湖水如轟雷掣電震蕩於疾風駭浪中急催檣歸大雨如注闔境霑足轉歉爲豐或曰邵甯張開泰兩尙書卽六童之二也

還杏花一

武進瞿麗江給諫裕之祖乾隆甲戌會試中第三名文已發刻填榜時總裁忽以莊本醇殿撰卷易之莊於是科大魁瞿聞以悲憤卒嘉慶甲戌給諫計偕北土甫登舟夢莊持杏花一枝贈之曰還君家故物事隔六十年不於其子而於其孫易魁而元似加利以償者事亦奇矣

贈眼鏡

熊次侯先生鴻才宿學負海內重名順治甲午典試浙江私念泄此名邦當得妙選爲天下冠將出京夢一羽士持眼鏡贈之曰以此相助試題吾十有五全章熊悉心決擇入手多虛籠大意無逆提七十者熊以未合聖人追溯神理忽於落卷中搜得一卷講下有吾今年已七十矣句以爲獨得驪珠狂喜竟置榜首副考取閱則通篇支離顧熊望重位尊力爭不得榜發夢前羽士曰較閱勞神盡羅珊綱眼鏡可便見還熊欣然付之新解元來謁則十六七少年也取文再閱處處皆疵不勝悔悶因叩有何陰德曰去年完娶交拜後新婦哭甚哀詰之則本字某貢生子父母嫌貧改嫁實不忍更事二夫門生與貢生子原係同學遂白父母悉將所有奩具贈女仍歸貢生子入闈文思鈍滯講下尤雖著筆燭跋矮屋間忽見一叟

白髮長鬚顧門生而笑因叩尊齒幾何曰吾今年已七十矣頓覺觸悟遂以領題不意偶合也熊啞然曰此其間殆有天焉令生執經親爲指授聯捷成進士入詞館爲名翰林

游絲毒

常州伍某素壯健方啖飯忽呼痛倒地云胸膈如刀割羣醫莫解閱三日奄奄待斃矣一老人過問病狀令磨陳墨汁與啜痛立止病若失因問此何症老人曰記少時鄰人患症類此一老醫磨墨汁飲之卽愈曰此誤食天絲毒也惟墨係烟煤所造能解今病相類故姑試之不料其果合耳

吳生奇遇

吳士常浙人祖某官武進令遂家焉父入縣藉補廩生至士常家益落屢應童子試不售遂販筆往來里塾間周振修者名諸生也館邑之巨紳家每售其筆初不知其能文一日吳至偶閱周生徒文指其瑕疵評騭頗允周駭曰君亦如此耶吳訴固世家子以貧故改業因留面試拈題立就老於咕嚕者不能過周慨贈一金勸之就試吳有族兄爲某寺僧過之述周意僧亦貸以千錢遂附舟赴江陰舟中

皆應試武童爲樗蒲戲吳私念人局能贏則往來川資無虞不半嚮輸盡仍以售筆餬口入場前一日囊無分文枵腹進場點至補考末名學使者長白玉公見其科頭藍縷訝爲送場廝役叱之去吳曰補考童子吳士常也公瞭視良久命歸號勉成首藝已餓極不可忍投卷欲出公視其文頗俊爽詰以何不完卷曰童生自昨日早飯今猶枵腹實不支耳公問食後復能文否吳唯唯復略詰家世命從人引入後堂飯畢入號文思頓湧一揮而就公閱笑曰次藝更佳可謂將軍不負腹矣次日考詩古懸牌單提吳某復試及入則諸童中先有一少年在案側冠服甚都心知卽周生徒公命偕至後堂酒饌徐指吳謂少年曰此汝同縣新拔武進學第一人也可畧資助少年敬諾後公按試他郡道出毗陵吳謁謝適守令至公極爲游揚時武進俞鍾君女方待字作壻脩焉次年食餽旋登賢書嗟吁腹負將軍久爲口舌得士如此大可爲千古解嘲而休休有容若一个臣者欲想見其人而不可自己孰謂風簷寸晷中少枵腹者哉

救生椿

海州許偕亭先生兆 陸乾隆壬寅通判 肝胎洪澤湖爲通稟要津風水不測常有

覆溺之患康熙時設救生椿河庫領銀歲修其製以長木排列湖濱近石隄處延表數里風雨夜懸鐙椿杪覆以簷篷舟行望鐙趨向北則繫簷椿上保全無算歲久漸成具文領項爲通判乾沒階亭先生建議修復幕客多阻之其弟立齋偶畫寢夢一翁白鬚朱履方領矩步語曰救生椿救生椿人人盡說不做何妨眼前功德難瞞上蒼爾若進言子孫必昌立齋詢所從來翁曳杖行至廳後短垣指以杖有門自闢而出俄聞犬吠聲如豹驚醒審視後垣初無門徑垣外犬吠聲猶狺狺也遣僕踰牆偵之白草黃蘆行潦徧野絕無人影疑爲社公因言於階亭先生先生曰吾盡吾職安用神道設教爲然幽明一致理實難誣無爲社公所笑也

蛇精

河南固始縣古蓼灣許姓業醫自言曾醫一奇症有人於元旦食湯圓訖方出門賀歲忽腹如火燒痛不可忍遂暈絕仆地移時稍蘇而號痛聲徹四鄰延醫診視皆云脈已如絲不治越日許至亦妄測虛摩究無確見忽門外來丐僧家人辭以有病僧曰何不問我衆人心笑其妄姑令診視僧遙望病人曰是誤食蛇精也許與辨論脈理且問何以一見卽知僧曰此無難少頃卽見真假於破囊中取藥一

丸促病者速服病者素吝恐索值昂不肯試僧窺其意笑曰檀越莫貧相易黃蘗一甕可乎因用水研灌移時病者起嘔如雀卵者數枚僧云未也復嘔穢狼籍出一物如雞子大僧曰是矣剖視乃血裹中蟠一小蛇見人遽動作勢上下病已若失乃共驚服叩之曰多年陳穀蛇外其上餘瀝粘着誤入腹中乃成斯物少停卽洞胸腹出矣飯已裹蛇徑去

夜光豬

瀕海多亮魚亮蝦黑地放光如螢海州北潮河柴港有胡姓者臘盡宰一豬將明分賣四鄉向晚忽室中光明如月驚視光出於肉恐駭人聽不得售因秘之次日鄰人買食亦無他異

爪蛇

康熙間石城村民蓄番瓜以御冬內一巨瓜形扁而圓一日剖之作羹中蟠大蛇此物理之難測者

生魂書額

淮陰崔鳳前明進士神擘窠書爲諸生時晝寢夢一隸役牽騎奉迎至亦一王侯

第下馬隨役自大門入守者呵之招役與語始放入二門亦然登堂役先入白俄一人攜椅至殿中又有筆墨置一小几崔意其求書自忖無案席役若已知曰書匾爾仰視懸一無字匾役令坐椅上恍惚間覺椅與筆墨几同時自起高與匾齊持者曰要書四字自左而右先殿字次寶次羅次森至森字末筆墨重下垂以袖抵淨畢椅自下役引之出仍乘前馬至門而覺袖上墨痕猶泔泔欲點也鄉會聯捷部選豐都縣既抵任暇攜一僕入陰陽界循途似與夢同至大門守者弗禁直至匾處字跡宛然忽見其舊僮某自內出曰相公何爲來此幸遇我否則不得返矣促之出送至途次指曰宜從此去勿遲後任滿返里常爲人言

龍馬

安東武生某家多馬內一馬尤健乘之赴淮比回至黃河涯天已曛黑重霧灑漫縱馬自行倏忽已到縣城訝其並未渡河命家人秉燭視之則四蹄皆涇上及於涇方知馬衝霧徑渡生發怒曰幸吾祖宗有靈吾則葬魚腹矣遂抽刀刺死次日剝其皮見四蹄及腹皆露鱗甲方知是龍懊恨不已天生神物不貢之天閑而爲武夫所乘已極困辱乃不自歛抑踏波飛渡少展神駿而已獲禍如此嗚呼士之

抱異才絕藝不自檢束卒至困阨以終類此馬者比比皆是世無識者則雖負超倫軼羣之材其不老死櫪下者幾何哉或曰是馬之借端自殺欲爲僇父殺不願爲僇父用也彼僇父者亦何足以知之

蟹虫殺人

京師後門某古寺有客屋三楹人居輒死不知凡幾人死無他異惟皮膚淡黃無血色相戒無敢居者有數少年欲窮其異相約具酒肴入室坐守覘之至夜半諸人但覺口有出氣無進氣久之益不可耐大驚急啟戶出秉燭四矚室之內外牆壁梁柱悉蟹虫布滿蠕動枕藉如恒河沙數駭甚遂避去次日再入周視無所得惟一巨鐘蹲地跡之蟹虫滿焉其出入當鐘組處孔竅乃周泥封固外熾烈火移時震動有聲流血水數斛臭不可聞自是患絕

武進縣役曹姓住屋帖近獄牆每二更牆下輒見螢火一團飛入牆內疑爲鬼火攜長竿擊之應手墮地散爲千萬點火星家人以炬來照乃蟹虫無數也又縣西街有飯肆後牆外卽監獄房屋獄囚夜蟹爲虫所擾不能安枕禁卒留心伺之黎明見蟹虫由獄門縫出循牆如蟻一綫相屬入飯肆後垣去徧求肆中不知所在

入夜驗之由肉砧出敗砧皆是焚之得數斛臭聞數里飯肆從此不振而獄囚貼席矣

放龍救子

儀徵汪啓元業鹽老僕徐某年七十餘止一子偶在門前見漁人拾一巨鼉售之徐惻然稟白主人給值三千買棹載往紗帽洲放之中流良久乃沒先是其子押鹽船赴江西因守風泊江口時同泊者數百艘擁擠一處候風揚帆汪以放龍適至其子因風逆船不能開隨侍暫歸是夜風甚一舟火發須刻數十里江面火光燭天數百艘蕩爲灰燼藉非放龍之舉則其子方候舟待發決無歸理其間默爲轉移實有鬼神特以報其好生之一念也

假妖自斃

贛榆諸生張子淵嘗有事夜行乘馬忽驚下馬四顧前有一物長如人雙目如炬頭頂盡明淵素有膽拔刀突前怪舒兩手作支格狀力劈其首怪卽仆地暗中摸索得弓足知爲女怪少憩月色漸明以刀劃張子淵殺怪處六字於樹遂行次早往探一婦人首戴木桶用明瓦爲雙目桶內燃燭半枝蓋裝怪截徑攫取財物者

嗟乎熙熙攘攘爲利來往貪心所使亦何物不有哉然使家給人足則路不拾遺矣是以古之聖王必先制民之產也

陰德延算

海州時毅修之父乾隆某年病垂危覺有人引至一處彷彿在南城外高阜上設公案官公服端坐旁有吏侍立赴審點名者紛紛無數忽人叢中遇其亡弟曰兄幾時來適聞唱其名即詣案前跪見吏呈一卷官閱訖曰此人有陰德二一施襌一條一施錢二百五十文算雖盡合延壽一紀速送回陽卽見先引者送之歸從牀上蹶然而起時死已二日將殮矣人問其詳云曾於某年冬見一赤身丐婦下無蔽體呼至隱處脫襯褲與之又寒天來一逃荒婦在土牆邊分婉急取二百五十錢以贈復令人持舊簪搭篷牆邊聊蔽風雨二事實出無心不謂竟蒙神佑也

僧報

康熙間歙人許毅甫先生宏遷海州之板浦鎮性仁慈一鄉稱爲長者一子年十九忽夭折許力行善事不懈時來一僧日夜行街市中曳鐵牌長二丈許名爲五十三參許見之問僧何處卓錫所化何爲僧言柴市古廟距此十五里因殿宇傾

頽募化修葺數月來尙少銀若干許如數與之鳩工庀材琳宇一新許每過柴市必入寺小憩與僧談論甚洽一日坐廳事僧自外入衲衣杖錫直趨後堂問之不答隨之入忽不見內室喧言生子矣遣人探之僧果於是日圓寂子取名西來卽康侯先生也醇德懿行州人矜式後嗣科名鵲起至今爲一鎮之冠

包痘

海州劉永有一子年五歲出痘徧體疙瘡大如甌凡三四十醫皆不識一老嫗年七十餘見之曰此包痘也吾所見并此而二決無他虞六七日疙瘡悉破內如榴子層層灌漿皆滿實從來未覩者痘書充棟亦無人道及可見醫理淵深卽痘疹一門已難測識矣

陸凌霄

康熙朝有陸凌霄海州之板浦人居心誠樸而多膂力家近伊蘆山嘗往澗口汲遇一翁貌甚清癯目之曰看汝形狀魁吾必有勇力盍學武藝以名世乎陸言無師翁曰明早來當以拳法授汝次日四鼓往候翁果來見陸先在甚喜引至一洞中極寬平授以技擊至半月餘翁曰藝成可歸矣吾海內弟子三汝其一也一女

子藝雖精所授未全倘遇相角勿傷其命一山東某力與汝埒腿法亦尙未全因子誠篤故以全術相授子宜守時安命勿爲暴里閭吾亦從此逝矣次日翁失所在陸家居數年深自韜晦聞揚州來一女子遠近拳師無敢與對陸聞竊疑師所言女弟子遂至揚見女年可二十許錦繡兩褶足履鐵鞋細纔盈握正登場招人相角次第騰而上者皆顛顧盼自喜頗涉嘲笑陸怒躍而登迴旋往復經一時許女忽騰雙足陸以雙手承之曰吾不看汝是女子劈之矣女愧服問姓名曰海州陸凌霄也女曰此吾師兄師曾言之問姓名不答夜半而逸由是大江南北無不知有陸凌霄者久之有山東賣油者肩擔至村貿易陸嘗買其油嘗數日取值適有貴客在座命俟明日賣油者不肯且惡聲陸怒其無禮遽出與鬪良久覺拳法有異潛起一足躡之其人跌出二丈餘起身再拜曰謹謝師兄陸詰之曰弟特爲此一腿來前之賣油今之相觸皆僞也陸不意爲其所賣後雖遇非禮相干亦恂恂如女子矣卒以壽終

王馥堂

王馥堂陽湖東橫林人生有神力少游江湖遇異人授以武藝能伏水七日夜生

平沈默寡言雖目不識丁而喜交文士有爲講說左氏春秋及三國戰爭事聽之欣然忘倦余弱冠遇於吳門每過滄浪亭與周保緒廣文濟較鎗法身長八尺而舞躍躡疾如猱牆穴大僅盈尺舉鎗一揮身如飛鳥輒穿而過保緒自矜鎗法得唐荊州先生絕傳然無以過也嘗偕遊虞山見言游墓鼎重數千斤王以兩手舉之繞墓三匝仍置原處若無事者常熱令陸君招致署中陸死柩眷不能歸乃出橐金徒步送之返里其任俠類如此後粹以傷寒疾化去年三十六若馥堂者世際昇平無可表見吁可惜矣

長春邱真人救荒三策

今值米價如珠飢民乏食粵垣諸善士亟議倡捐賑粥夫善舉首先立法法善則周熊勉齋先主有云救荒不患無奇策只患無真心有真心卽奇策也予謂有真心卽有善法法善卽奇策錄此以備廣採耳

乾隆丙午江南大饑天中節蘇州粥廠告竣衆善士設醮於葑門外文星閣扶鸞長春邱真人降亂因問吳中各廠諸董紳士功過優劣真人曰昨同諸真校閱蘇州粥廠諸冊乃各府縣城隍會同嶽府糾察司上奏諸真再三磨對各廠功過不

同大約以九功一過爲最上至六功四過而止此由策未全善故亦無全功蓋粥廠雖有救人之功其中亦有九害筋力已衰龍鍾就食一遇擁擠昏眩隨之不死於家而死於廠其害一也童男童女或依父母而來或附公婆而至一到廠前男赴男廠女赴女廠各不相顧因此掠賣無處找尋生則淪落卑田死則轉輾溝壑其害二也大雨淋漓雪風凜冽泥塗躑躅寸步難行雖得一餐已同九死其害三也男廢耕耘女拋縫績偶因本年秋歉兼釀來歲春荒其害四也飢饉帶病之人跋涉不勝其苦而粥又溫寒不等遲早無時不能救飢反以速死其害五也懷胎婦女或因損以墜胎或滿月而將娩飢傷血暈湯水誰憐感冒風寒終身致疾其害六也日候關籥夜棲孤廟風簷打盹溼地權眠穢氣薰蒸染成疾病其害七也或有無識婦人遭逢浪子既喪名節且致拐逃雖悔恨以難歸亦迫尋而莫及遺孩啼哭老母悲酸夫歎斷弦妻同覆水其害八也蠅蟲滿身垢膩徧體散處已堪掩鼻合聚更覺難聞惡臭不堪染成瘟疫大荒之後瘟疫流行其害九也爾等雖有實心未得善法故欲邀全功而未能耳衆皆悚然起叩盡善之法眞人曰爾等爲天下後世打算可謂善士道人何忍不言然人心不古纔過荒年農家忘水旱

之憂市井忘饑饉之苦併紳士亦忘賑濟之勞道人雖熟籌有三策恐未必能遵行也然寧可言之而不行不可因不行而不言第一末雨綢繆策凡府州縣各有鄉都圖甲地方大小烟戶多寡不齊每圖舉殷實老成者爲董事一人副董十人同心協力捐辦倉廩除五六分年歲不捐外每夏秋兩熟豐收之時副董查有實田十畝者起捐每畝冬米四升夏麥二升實田五畝租田五畝者每畝捐冬米二升夏麥一升共收米麥若干登記明白貯倉封鎖如遇青黃不接之時出陳易新或做社倉例出借有田之人酌量起息無田者不准貸借或借無償經手人罰賠若遇大荒查明實貧戶口造冊無濫無遺五日前憑票注明村戶大小幾口大口日給麥六合小口日給麥三合麥完大口日給米五合小口日給米三合十日一給米麥足敷五月之糧則從十一月半給起四月半爲止僅敷三月之糧則從正月十一日給起四月初十日爲止卽著首副董事司其事其有窮鄉無告鄰近富圖務須協濟如此則男不廢農婦不廢織旣免九害并獲四益矣何爲四益 聖上愛民如子每遇偏災 特旨輒發帑金數百萬兩而民捐三百兩以上者概准議敘其百金數十金者給獎有差較之捐職納監其榮百倍其益一上帝好生凡

救人者其功大於救物救宗族親戚者其功又大於救人獨至救荒則不論親疏遠近皆爲莫大陰功況乎綢繆未雨更爲上契天心後嗣榮昌尤堪預必其益二每遇荒年局捐圖捐俱不能免官吏催呼紳士勒迫因而賄求情囑以冀少捐不惟無功最爲造孽况彼已遇歉而勢必取盈則捐多嫌少而力已竭蹶此則豐年而數有定額則積少成多而力尙有餘其益三每遇荒年飢民結伴成羣強求硬索非特無心獨飽抑且禦侮無由若用此法則貧富俱可兩安雍睦積成風俗其益四爾等何不勉而行之第二臨渴掘井策或逢大歉之年紳衿善士鈔錄設廠九種之害呈明府縣知縣傳諭老成練達書役告以神鑒非遙實力辦公子孫榮貴先令該房查鄉圖城廂完糧細冊及有無生理併密傳各圖廂保不拘士農工商早報上中下三等殷戶選舉公正董事協同現保查各圖各鄉實在貧窮飢口勿濫勿遺註冊然後出帖邀請各廂圖三等殷戶並請諸紳士於城中設局勸捐或此圖捐戶多而飢口少或彼圖捐戶少而飢口多總須畛域不分有無協濟以廂圖大小酌舉正副董之多寡或錢或米五日前給票十日一給發滿日彙冊呈縣核存爲下月而年底本如是則飢民免九害而沾實惠官吏紳衿善士俱準全

功第三捨子留母策須大力好善者爲之昔旌陽許眞君富而好善每遇豐稔糴米數萬石三年以陳易新如遇大荒減價平糴貧者私給米票每口給米八合遇稔乃止後遇謹母元君授以大丹晉太康二年八月初一日全家四十二口拔宅上昇今天下殷富者不乏其人各量力爲之大以成大小以成小或數千石數百石卽三十五十石俱可行此法所費不多爲功甚大也道人籌此三策爾等刊印流布敬謹奉行普濟無量自獲百福若不能行此三策則於城中每廂設粥擔以廂之大小爲擔之多寡桶上設蓋每擔可給飢口二十名備大盥二十隻用過洗淨醃菜一小桶兩擔同行此擔未完彼擔已熟鄉村亦照此法亦可免九害而濟燃眉否則熟視飢民輾轉而死與其忍心害理爲鬼神深惡痛絕之人寧犯九害而設粥廠尙有濟人之大功也道人與爾等有緣坐談已久爾等能自修自證功成行滿焉知不與道人同作十洲三島客耶勉之勉之若疑亂語難憑則負道人一片婆心矣

宋若水

宋若水海州人年三十餘曾充鹽場書吏後告退別營生業正直爲鄉黨所重有

疑難事力爲排解人多稱道之乾隆四十九年暴疾卒家貧無子止一女親友劇資買棺既殮宋忽兩目轉注四體蠕動衆駭絕恐其走屍急闔棺宋呼勿懼我復生矣詢再生之由曰吾被二鬼縲綬至冥司解縛令跪見上坐官烏紗錦袍命判檢簿問此人壽算絕否曰然問此人有善事否判閱簿良久曰只生平善爲人排難解紛大事說小小事說了鄉黨皆敬之上坐者曰解仇釋訟所全不少可加壽十年仍命二鬼送歸果逾十年卒

舟女殺盜

高郵布商常往來淮陽吳楚間一日自漢口攜厚貲僱舟南下舟人皆一冢眷屬有女年十六能把舵矣貌婉麗不類舟人行次小姑山適大風雨一尼倉皇張蓋淋雨中求附舟赴皖舟人不答商曰如此大雨又係比邱隻身求載情殊可憫命登舟虛房艙居焉越日雨霽船開舟放江心方早餐尼忽於傘底出大鐵錘繫案案碎厲聲叱曰汝等亦知江湖張鐵錘乎各自爲計勿污我錘商大哭女懇曰現炊粥但求粥熟飽食而死死且無憾尼許之粥熟女掇鍋入艙出不意遽覆鍋尼首尼狂叫痛絕則已無我相矣商以千金聘女爲妾攜女而歸

狐捉刀

常州北門陶生夢晉貌美工吟而拙於制藝嘗私一狐偶閱其文不覺失笑曰觀子貌與文殊出兩人時文功令所尙奈何薄之生曰世外人亦善此乎曰此雖非專門顧頗涉獵及之較君固當稍勝隨拈題成一藝則老於咕嗶者不能過也由是奉爲師保攻苦經年稍有進境而文筆平弱終嫌膚淺適當大比陶懇狐幻形入試曰此斷不能凡鄉會試皆帝君監臨諸神巡邏嚴密一經察出身敗名裂兩無所濟生曰然則隨我入闈捉刀何如狐亦力拒固懇之狐不得已乃斂形附生入闈題紙未下隔宿預知擬成三文一詩甫脫稿擲筆曰殆矣已爲號神所察恐不能脫禍不意一念之癡自戕生命君如念夙好望於鷄鳴山下收葬遺骸言未畢忽然一聲似被擒去生慟甚攜卷出場見鷄鳴山麓一狐身首異處具棺殮葬之題其主曰狐妻白氏云嗚呼儻楚胸中無墨汁乃至乞牀頭人捉刀使能文之靈物不克永年惜哉

厲鬼畏犬

京師菜市口爲行刑之所相傳鬼最多黑夜人不敢過戈明經雲樵嘗飲於友人

家夜深無寃車處乘月步歸經其地見一人高丈餘徧身皆白頰所塑無常鬼而大過之于然從對面來生駭絕而各肆門已閉急無躲處見市廊下有席數片取以自蔽穴孔以窺手中不知何執向地力擲即迸出無數人首及斷臂缺足翻滾滿街長人掬啖之格格有聲立盡數骸似已果腹揚揚向西去羣物隨之跳擲而行方欲出忽風聲大作又有無頭鬼數十湧跳而前未後一物追至徧身色藍腿粗於象以豹皮蔽下體目灼灼在臍帶間鬚髯張兩牙外露長尺許四顧搜羣鬼不得見戈避席中抒手欲攫戈心膽皆裂方危急間二犬至嚙物足物怒舍戈逐犬犬走而吠益急羣犬聞聲吠亦吠遠近相應如百千豹聲旣而羣集環嚙之物艱於轉旋似響叱聲震屋凡街卒驚起擊以鳥鎗倒地化爲碧燐移時始滅見戈暈倒灌以薑汁乃蘇送之歸病月餘幾死自是不敢隻身夜行

鬼贈贐金

貴州鄺雲舟觀察未遇時以明經謁選入都中途一老僕病死闕二日車夫又暴亡村僻無轉雇處驅車獨行日暮離宿尙遠方深焦慮遙見燈光數十自林間出疑遇暴客益惶怖泊視之則健奴多人各跨馬擁一貴官被服鮮麗戴豐貂坐煖

與其行甚駛遙望光已漸杳意是大僮過境者不之異驅車前行見路旁小村落有一店頗寬廠卽停車覓食喂馬而途遇之貴官已先在見鄔至命奴邀入訊問何來鄔卽緬述其人起敬曰耳大名久矣幸成邂逅草舍咫尺願垂光顧遂起就輿先發鄔心疑以問主人主人曰于相公也其人巨富君旣爲所款福不淺鄔遂行約五里許已有多人列炬相導至門鼓樂喧聒于盛服出迎延入坐定鄔請邦族于曰山野之人姓名不欲人知無煩窮詰今邀君至固非禍君者列筵相款備極豐腆飲將終一奴奉盤出貯朱提四枚起向鄔曰知君途中多故以此壓裝勿嫌菲薄也鄔固辭于強納之命奴辦燭送歸寢入室鋪設精麗牀榻尤整潔輾轉未寐五更始睡熟至曉夢醒則身臥古墓車馬行李皆在疑是夢幻而贈銀宛然至都入闕被放除汝山令復過其地問之土人竟無知者

蟒母

上元許翁家可中資嘗見流民渡江有嫗攜女登門求售翁視女年十三四雖滿面塵沙而眉目間饒有風格惟兩足未加行纏卽呼王大脚云年餘益長成流目送笑極逞佻冶翁惑之蕩甚翁不能支未幾卒媼嗔其妨主鬻之賣酒周六日坐

當墟市中無賴瞰其鬻爭來就飲與之調笑不拒周因獲利多亦不禁也王操作甚勤終日營營未嘗暫息積有贏餘輒買介族放之每至午日輒病必以重衾厚覆使周壓之戰慄移時始定來時攜一青布囊不知所藏何物十餘年周又病死無嗣抱鄰子育之子漸長爲之娶婦生計益裕可以坐享而操作如故子婦少愾輒斥責之一日有老僧過見王熟視久之呼其子至隱處詰曰子係若親子耶子報然良久曰螟蛉耳僧曰余固知若之不能育也子言雖非所出恩勤不啻親生方外人何爲問我骨肉僧曰幸遇我遲則爲所噬矣子不信僧令出掌作符矚曰持歸近汝母母如妖也著處當即潰驗後可向報恩寺來子如言侯王盥洗時試以掌撫其臂王大呼視之果已腐爛次早王忽寢房內被竊子奔視箱篋無恙惟青布囊失所在王痛哭暈絕子慰之曰幸錢物未動一布囊值幾何而珍惜如是王曰非汝所知此賊必深知我故乘間盜去因切齒子知有異訪僧報恩寺僧曰汝家昨夜被盜而囊去渠無能爲仍宜敬事撫育之恩不可忘也取囊視之則一蟒蛇皮曰母即此物所化今既失去不能復形爲害渠在人間放生功德甚大且未嘗損人尙可享安樂數十年汝當盡孝福汝者尙不淺也子大感悟酬之不受

復令出掌作符令歸摩母臂痛當止但不可洩洩則恐不利於汝子歸如言試之王臂遂愈明且復往訪僧則已杳矣王之子歸洩言於母家其事遂播上元馬是閻秀才聞其異過之王起居動作與人無殊惟年將過甲如二十許人云

駝媼

趙山癡舅氏性耽遊覽新婚數月即出恒數旬不返舅母方通州人初至飲食起居不慣欲歸寧憚堂上嚴不敢請恒鬱鬱一夕燈下坐方深冥想一駝背媼攀簾入操鄉音曰何處不覓姑乃在此耶方疑母家遣來喜起迎問答曰老身與姑同里黨流寓此多少年聞姑來欲一聞鄉里近事耳共談甚樂更闌始去次夕復至門未啟已在室中駭問曰實相告我乃鬼也夜臺幽寂忽值同鄉故來攀話並無相害意幸勿疑方素有膽不之懼因問景何如曰與人世無殊惟天色昏慘恆漫漫如長夜耳問輪迴之說曰凡人有大功德大罪孽者死後即時轉生各視生前所爲判投胎之高下人畜攸分皆由自召不俟司事者始定也若我者生既庸庸死益寂寂更無所謂轉輪之事問凡人初死必先見閻羅乎曰有功當賞有罪應罰方往見此外則隸籍城隍各安其素不必親赴譬如平民無事不見官

府陰陽無二理也。問凡鬼神喜受香火，何故曰：鬼神皆氣所聚，日久氣衰，則靈爽失。凡人敬是神，則其精誠必專，故得借其餘氣自續。若不誠，則其氣已散受之者，無益也。究之非香火能靈鬼神，實鬼神賴香火以靈。有問媼有子孫否，愀然曰：生命不辰，孤窮旅葬，故土雖有，後裔遠骸，尚不得歸。每歲清明一返閭里，受麥飯一盂，殊難下咽也。因歔泣下。問媼何不投生好處，曰：此須城社諸神列善惡具申北斗，方得注名。老身生無功德，死後兩手空空，何處托人轉注，聽其自盡而已。問鬼尚死耶，曰：氣在則存，氣盡即滅。泉下固無數百年長在之鬼也。卽或有之，非強暴爲厲，卽狐媚祟人。此種行爲，上千天律，往往有求長反促者。因謂方曰：姑思家老身一導回里，何如。方大喜，問道：遠如此，舟耶，輿耶，媼云：無需因起，挽方同行。須臾已至升堂拜母，若不之見。起語諸姊妹，亦不酬答。但見家人婦往來搗粉團，酥作餅餌，若甚忙者。試取一餅置袖中，衆亦不覺聞。母喚蒼頭至，囑曰：明早卽起程。赴常見二姑，言我病甚亟，思一見，願早歸也。方聞言，向母大呼曰：兒固在此，母駭絕，推燭於地，連稱有鬼。方欲再言，媼自後挾之出，相將同行。至一室，媼從門隙中擠之入，頓然而蘇。疑是夢幻，而餅固宛然在袖也。越七八日，蒼頭果至，問以家中。

事一一不爽，言作餅夕對面聞鬼聲。及夕媼復至，曰：「今夜前村某大戶家陳百戲，盡往觀。至則自有坐處，湘簾下垂，燭明如晝。先有婦女十數人在內，見方至，羣起迎。卽有婢攜茗至，方欲飲，婦遽入，止之。須臾，簫管競作百戲，疊陳最後昇一桶，至有百十小兒跳出，皆五色短衣，迴環跳躍，舞蹈應節，條踏肩連臂，疊成一山，匐然一聲倒地，化爲憐碧。堂上燈燭亦滅，駭極而醒。方自與媼往來，半年餘，面目憔悴，外祖母程恭人察其顏色，有異，並聞夜臥切切，似與人語，疑而伏聽之，果然急排戶入，媼倉皇遁，以刀擲之。至衣架下而沒。次夕媼復來，曰：「本圖永敍，不意爲汝姑所窺，請從此別出。紅藥一錠贈之。」曰：「姑近我久，爲陰氣所逼，恐致疾，服此當愈。」遂去。明日就沒處掘之，得一棺，遷之郊外，遂絕。余少時舅母出藥，見示類硃錠，嗅有微香，因未達，無敢嘗者。」

錢妖

郡人瘍醫陳心帆，鬻技自給，廿餘年矣。一夜就枕，聞牀頂窸窣作數錢聲，竟夜不絕。喜謂婦曰：「此必神將見福，故示兆耳。」遂市香紙禱之。次早牀頭得錢如買物數，異之夜數錢聲益急。因與婦商廣購牲醴，夜分祝而祭之，冀得厚貺。是夕聞撒錢

聲急如雨點不知幾千萬億婦促曰速起搬運少遲夫婦並葬錢孔矣陳披衣起捫之已過尋丈出錢堆匍匐尋戶出顙額皆被磕青紫不自知病苦心喜一旦驟富往喚竈下媼同運點燈入則四壁如故牀前僅有大錢三枚媼挪揄之曰如此嚴寒半夜促人起錢竟安在日得賣藥資啜一甌粥今乃想得橫財耶陳愧憤交集向空大罵自是拋磚擲瓦擾無虛日或曰具狀訴獄帝當有驗陳如言繕黃紙置帳頂擬明日往投夜臥紙忽自破恨甚明日至獄廳另書焚之歸至三更堂屋刃劍格鬪聲甚喧不敢出視久之始息但見門角遺狐毛一堆怪遂絕

靈官書吏

邑中銀工李某妻頗有姿致喜倚門一日李自外歸室門堅扃窺是美少年擁婦榻上婦呻楚欲絕李憤火中燒破門入少年條不見婦忽操北音罵曰李某欲行暴耶殺爾如縛豕耳李怒以棍擊之婦舉手相格棍落於地曰技止此耶我姑去明當偕同事來可備酒肴以俟婦遂倒臥迷罔若癡移時始甦云方獨坐忽少年自簷下入遽前狎抱方欲撐拒而手足如縛今含怒去必將逞毒奈何李籌思無策商於鄰翁翁曰此邪祟何不延術士驅之紅梅閣徐道士大高行請其敕勒或

當驗如言設壇作法少年白晝持劍至盡毀諸所設施諸道士踉蹌去徐方欲作符少年笑曰我靈官正神也發符何爲徐窘於術亦辭去李入房失婦所在尋之赤臥溝中下體如割血涿涿奄然一息而已從此昏迷不知飲食李無如何控之嶽廟杳無應驗憤甚向神痛哭數之忽仆他見二人擒之跪階下神怒曰何物姦民敢來妄控靈官正神詎姦人婦女者命役杖之李大呼曰妻被姦汚靈官乃其自認屢呈上訴未蒙示應何妄控爲神曰狀何在曰焚爐中久矣須臾鎖一吏至神大聲責詰吏戰栗不敢言命熾鐵烙之始供小吏本不敢舞弊日前靈官案前主計吏囑爲掩飾情不能却故爲隱藏不意其遽敗也旋聞傳呼靈官進須臾五人皆本朝冠服伏地請治失察罪神曰我尙爲所蒙豈特汝等令回廟聽勘旋有金甲神擒主計吏上衣飾甚華神怒曰小吏被服如是其他可知喝令供姦騙李妻狀訖命梟示通衢謂李妻曰汝冶容誨淫姑免杖令李領回李遂魁出至廟門外見數百人圍繞聚觀一巨蛇如刀截云婦遂痊越兩月忽又瞠目大呼曰汝日濃粧豔抹勾引人家男子害我守寡乃安然自在耶今既相值必不汝容李再具狀嶽帝竟不應李幼子偶市黃煙礮數枚點放作戲婦在牀呼頭痛罵曰黑心人

固應生此惡兒奪擲牆外李悟砲有硝黃度必爲所畏密市二物投湯中進婦少頃婦腹痛若裂嘔出一蛇已腦裂死自是遂安

校正翼輞稗編 卷三